

BOSNA I HERCEGOVINA
FEDERACIJA BOSNE I HERCEGOVINE
ZENIČKO – DOBOJSKI KANTON
KANTONALNO TUŽILAŠTVO
ZENIČKO – DOBOJSKOG KANTONA

Broj: T04 0 KT 0063419 25
Zenica, 24.09.2025. godine

OPĆINSKI SUD U ZENICI
-Sudiji za prethodno saslušanje-

Na osnovu člana 45. stav 2. tačka i) u vezi sa članom 241. stav 1. Zakona o krivičnom postupku Federacije Bosne i Hercegovine (ZKP F BiH), p o d i ž e m,

OPTUŽNICU

Protiv:

1. A. S., neosuđivana,
2. A. B., osuđivan

da su:

dana 21.03.2025. godine u vremenu od 14,00 do 14,30 sati, u Zenici, u ulici ..., tačnije u zgradi Policijske stanice ..., u službenim prostorijama u holu ispred prijemnog pulta i službenih kancelarija, prijetnjom da će izravno upotrijebiti silu pokušali spriječiti ovlaštena službena lica Policijske stanice ..., u vršenju službenih radnji koje su preduzeli u okviru svojih ovlasti pri obavljanju poslova čuvanja javnog reda,

na način da su čekajući u navedenim službenim prostorijama ispred prijemnog pulta i službenih kancelarija najprije počeli da narušavaju red i mir tako što su galamili i negodovali i prijetili da će napraviti veće probleme ukoliko se ne postupi prema njihovim zahtjevima zbog kojih su pristupili u Policijsku stanicu ..., pa kada im se obratila policijska službenica M. G. i izdala usmenu naredbu da oboje napuste službene prostorije stanice jer su ometali normalan rad, isto su odbili i tada je A. B. počeo da negoduje i galami, pa kada mu je policijska službenica M. izdala novu usmenu naredbu da napusti stanicu, on je to ponovo ignorisao i na njen zahtjev nije želio predati ličnu kartu koju mu je tražila radi uvida i legitimisanja, već joj se podsmjehivao i govorio da joj neće nikada dati ličnu kartu, da bi mu u tom trenutku prišao i policijski službenik Z. S. koji ga je upozorio da će biti sankcionisan ukoliko ne postupi po zakonitim naređenjima policijske službenice, da bi A. S. izvadila svoj mobitel i počela da snima razgovor između policijskog službenika Z. i A., kada ju je

policijska službenica M. upozorila da prestane sa snimanjem i izdala joj usmenu naredbu da sa njom pristupi u kancelariju kako bi obavili razgovor i evidentirali događaj, što je A. odbila i samo je nastavila snimati mobitelom, što je radila uporno unatoč usmenim naredbama koje joj je M. izdavala, pa je A. počela da se približava M. konstantno je snimajući i govoreći da joj niko to ne može zabraniti i tada je počela da maše rukama prema M., te je M. tada A. uhvatila u namjeri da je sprovede do kancelarije dok je A. cijelo vrijeme pružala aktivan otpor, ali je M. uspjela da je uvede u kancelariju gdje je započela kriminalističku obradu, da bi nakon nekoliko minuta A. ušao u kancelariju, pa kada je vidio da je A. imala crvene tragove po rukama počeo je da se agresivno ponaša i prijeti M., te joj se „unio“ u facu i obratio riječima: *„Sinoć me je toliko glava boljela, sanjao sam B. M., j* sam mu mrtvo dijete i svaki dan mu j* mrtvu kćerku, a tako ću i tebi zbog ove masnice na njenoj ruci!“*, dok je izgovarajući navedeno pokazivao na crvenilo na A. rukama, i udarao dlanom o dlan, praveći agresivne gestikulacije, grimase i izraze lica, mahajući rukama prema M. i tako joj dajući do znanja da je želi fizički napasti, te je na kraju dodao: *„Neće te biti i letićeš sa te pozicije!“*, da bi ga na kraju slobode lišio policijski službenik Z. S.,

pa su tako A. i A. svjesni i znajući da opisanim radnjama sprečavaju policijske službenike u vršenju službenih radnji koje su poduzimali u okviru svojih ovlasti, to i htjeli,

dakle, silom pokušali spriječiti ovlaštena službene osobe u vršenju službene radnje koju su poduzeli u okviru svojih ovlasti pri obavljanju poslova čuvanja javnog reda,

čime su, svako za sebe počinio krivično djelo „Sprečavanje službene osobe u vršenju službene radnje“ iz člana 358. stav 3. u vezi sa stavom 1. sve u vezi sa članom 28. KZ F BiH.